

UPOZORENJE: ČELAVI IBIS SLETIO U BOSNU I HERCEGOVINU

Izuzetno rijetka ptica čelavi ibis poznata i kao "nova" primijećena je u okolini Cazina.

Ova je vrsta, koja još nosi naziv „nova“, još u 17. vijeku izumrla sa područja Bosne i Hercegovine i cijele Europe. Gubitak staništa i lov smatraju se glavnim razlozima za njen nestanak. Početkom 21. vijeka svjetska populacija čelavog ibisa (*Geroniticus eremita*) svela se na svega 200-250 jedinki, koje su opstale na području sjeverne Afrike i Bliskog istoka.



Čelavi ibis „nova“

© Fotografija je djelo Krisitijana Mandića ista je preuzeta sa <https://www.facebook.com/BentornatIbis/photos/a.364201130404406/2023908961100273/?type=3>

Ibisa nalazimo u mnogim historijskim izvorima, pa se između ostalog, na egipatskim hijeroglifima prikazuje kao "akh" – simbol ljudske duše. Već je 1504. godine proglašen jednom od prvih zaštićenih vrsta ptica u Austriji, što ga nažalost nije spasilo od izumiranja.

Kako bi se vrsta očuvala i vratila na nekadašnja europska gnjezdilišta u Austriji, Njemačkoj i Španjolskoj su pokrenuti projekti reintrodukcije kojima se pokušavaju uspostaviti divlje populacije čelavog ibisa u Europi. Zahvaljujući odličnom poslu suradnika na projektu LIFE Northern bald ibis – Reason for Hope, čelavi ibis se danas opet gnijezdi u Njemačkoj i Austriji, a jedan od ciljeva projekta je učenje ptica selidbi do zimovališta u Italiji i natrag.

Kolonije trenutno broje oko 140 jedinki i od 2014. se svake godine organizira selidba ibisa vođena motornim paraglajderom. Tako mlade ptice uče svoj selidbeni put s kolonija u Austriji i Njemačkoj do zimovališta u toskanskom rezervatu Oasi WWF della Laguna di Orbetello. Odrasle ptice koje poznaju put vode nove generacije te se tako dugoročno uspostavljaju migratorne, divlje populacije ove vrste

Ova izuzetno rijetka vrsta ćelavi ibis/nova je skrenula sa svoje redovne rute i sletjela je na područje Cazina. Ovu informaciju potvrdila je Organizacija za zaštitu životne sredine "Bentornato Ibis" iz Toskane u Italiji, koja prati kretanje ove izuzetno rijetke vrste ptica, kojih je, prema njihovim istraživanjima, na svijetu preostalo još svega oko 300.

Apelujemo na javnost da svoje aktivnosti usmjere tako da što manje ometaju let ove vrste kao i na zakonske kazne koje proizilaze iz Zakona o zaštiti prirode uslijed nedozvoljenih aktivnosti uznemiravanja divljih vrsta.